



Sambanwá

GIYA SA PAGESAMBA KAN BANWAAN NIN DIOS

SOLEMNIDAD KAN MAHAL NA PUSO NI JESUS
11 JUNIO 2021 • TAON B • PUTI

RITO SA PAGPOÓN

Pataratara

C — “An Pagkamoot ni Jesus”

An devocion sa Mahal na Puso ni Jesus sarô sa mga minapakusog asin minapayaman kan Cristianong Pagkabuhay. An devocion na ini na minagamit kan mga tradisional na simbolo nin pagkamoot, minapahiling sato kan dakulang pagkamoot ni Cristo Jesus sa satuya gabos. Ini man nagpapagiromdom sato kan pagkamoot na dapat niatong ibalos sa Kagurangan sa paagi kan satong pagkamoot sa kapwa. Asin huli kaini inaapod kitang maghagad nin tawad para sa satuyang pagiging daing pakilabot asin pagkakasalà. An devocion na ini na nagpoon kan 17 siglo, nagdadara sa buhay Cristiano kan mga minasunod: an gawe nin reparacion, an devocion kada enot na Viernes kan bulan, an Pag-Ora Santa, asin an pagbugtak nin imagen kan Mahal na Puso sa mga harong asin iba pa. Sa satuya lugod na pag-devocion sa Mahal na Puso ni Jesus manodan niato an tunay na pagkamoot sa Dios, sa satong mga familia asin mga kapwa.

Antifona sa Paglaog

(S 32, 11. 19)

(Sinambit kun mayo nin Awit sa Paglaog)

An mga pagmate kan saiyang Puso poon sa kapag-arakian sagkod sa kapag-arakian, tanganing magligtas sa kagadanan kan saindang mga kalag, asin mag-ataman sainda sa gutom.

Pagpangurus asin

Pagtaong-galang (Tindog)

P — Sa ngaran kan Ama, asin kan Aki, asin kan Espiritu Santo.

B — Amen.

P — An Kagurangan mapasaindo.

B — Asin sa saimong espiritu.

Gawe nin Pagsolsol

P — Mga tugang, akoon ta an satong mga kasalan, tanganing magkanigo kitang magcelebrar kan mga banal na misterio.

Gabos — Nagkukumpisal ako sa Dios na makakamhan, asin saindo, mga tugang, ta nagkasalà ako nin makuri sa isip, sa tataramon, sa gibo, asin sa kapabaya-an: salà ko, salà ko, makuring salà ko. Kaya nangangadyi ako ki Santa Maria, danay na Virgen, sa gabos na Angeles asin Santos, asin saindo, mga tugang, na ako ipamibi sa Kagurangan tang Dios.

P — Maherak man lugod satô an Dios na makakamhan asin, pakapatawada an satong mga kasalan, darahon kita sa buhay na daing kasagkoran.

B — Amen.

Kagurangan, maherak ka

P — Kagurangan, maherak ka.

B — Kagurangan, maherak ka.

P — Cristo, maherak ka.

B — Cristo, maherak ka.

P — Kagurangan, maherak ka.

B — Kagurangan, maherak ka.

Kamurawayan

Gabos — Kamurawayan sa Dios sa kaitaasan asin sa dagâ katoninongan sa mga tawong marahay an boót. Inoomaw mi ika, rinorokyaw mi ika, sinasamba mi ika, pinapamuraway mi ika, pinapasalamatan mi ika huli kan dakula mong kamurawayan, Kagurangan na Dios, Hadeng langitnon, Dios Amang makakamhan. Kagurangan Aking Bogtong, Jesu Cristo, Kagurangan na Dios, Cordero kan Dios, Aki kan Ama, ika na nagpaparà kan mga kasalan kan kinaban, kaheraki kami; ika na nagpaparà kan mga kasalan kan kinaban, akoa an samong pakimaherak; ika na nagtutukaw sa too kan Ama, kaheraki kami. Ta ika sana an Banal, ika sana an Kagurangan, ika sana an Orog Kahalangkaw, Jesu Cristo, kaiba kan Espiritu Santo: sa kamurawayan kan Dios Ama. Amen.

Colecta

P — Mamibi kita.

O Dios na makakamhan, namimibi kami, warasan na kaming nag-oogma sa Puso kan namomotan mong Aki, asin nagroromdom kan mga piniling biyaya kan saiyang pagkamoot samo, magkanigong mag-ako kan nagsusûpay na gracia gikan diyan sa langitnon na burabod nin mga balaog. Huli ki Jesu Cristong Kagurangan ni amo, saimong Aki, na kaiba mong nabubuhay asin naghahade, kasarô kan Espiritu Santo, Dios, sa gabos na kapanahonan kan mga panahon.

B — Amen.

LITURGIA KAN TATARAMON

Enot na Babasahon (Tukaw)

(Osea 11, 1. 3. 8-9)

Si Profeta Osea, sag abos na Profeta sa Lumang Tipan, iyo an naglaladawan sa pinakamagayon na paagi kan pagkamoot nin Dios sa saiyang banwaan. An babasahon na ini nagpapahiling kan dakulang pagkamoot asin pagpatawad nin Dios sa saiyang mga aki.

Pagbasa sa Surat ni Profeta Osea

Nagsasabi an Kagurangan, “Kan an Israel aki pa, namotan ko siya, asin bilang aki kong lalaki inapo ko siya paluwas sa Egipto. Alagad ako an nagtukdo sa Israel sa paglakaw. Sa sakong mga kamot, kinilik ko an sakong banwaan, alagad dai ninda inako na sinda sakong inataman. Dinagka ko sinda sa sako huli sa pakikipagkatood asin pagkamoot. Initaas ko sinda dangan idinuta an sakong pisngi; nagduko ako sainda asin pinkakan ko sinda “Mapapabaya-an ta ka daw, O Israel? Matitios ko daw na bayaan ka? Pwede daw na raooton ta ka siring kan ginibo ko sa Adma, o gibohon saimo an ginibo ko sa Zeboiim? Dai minatugot an sakong puso na gibohon ko iyan! Dakula nin marahay an sakong pagkamoot saimo. Dai ta ka papadusahan sa sakong kaanggotan; dai ko na naggad raaoton an Israel. Huli ta Dios ako asin bakong tawo.

Ako, an Banal na Dios, kaibahan nindo. Dai ako madiyan saindo sa kaanggotan.

Tataramon kan Kagurangnan.
Gabos — Salamat sa Dios.

Salmo Responsorio

(Isaias 12, 2-3. 4. 5-6)

S — Maogma kamong magsakdo nin tubig sa mga burabod kan kaligtasan.

1. Uya, an Dios nin sakong kaligtasan, matiwasay ako, dai natatakot, kusog ko asin isog an Kagurangnan nagi ko siyang kaligtasan. Maogma kamong magsasakdo nin tubig sa mga burabod kan kaligtasan. (S)
2. Magpasalamat sa Kagurangnan, apodon an saiyang ngaran. Ipaaram sa mga banwaan an saiyang mga gibo, ipagiromdom an kahalangkawan kan saiyang ngaran. (S)
3. Magtugtog sa Kagurangnan huli kan kahalangkawan kan saiyang gibo; ipaaram ini sa bilog na kinaban. Magkurahaw asin magsuriyaw sa kagaya-gayahan kamong mga taga-Sion. Ta dakula sa tahaw mo an banal nin Israel. (S)

Ikaduwang Babasahon

(Efeso 3, 8-12. 14-15)

Ngonian madandangog niato sa surat ni San Pablo Apostol an magayon na pag-omaw sa pagkamoot nin Dios sa saiya siring man para sa gabos na mga nagtutubod. An huring mga tataramon sa surat na ini nagpapahiling kan pagkamoot kan Mahal na Puso ni Jesus.

Pagbasa sa Surat ni San Pablo sa mga taga-Efeso

Ako na pinakasadi sa gabos na mga banal, tinawan kaining gracia na irokyaw sa mga pagano an daing tugkad na kayamanan ni Cristo, asin ika-paliwanag sa gabos na tawo an misterio na sa haloy ng panahon, nagtatago sa Dios, kaglalang nin gabos na bagay. Tadaw? Tanganing ngonian, sa tabang kan simbahan na mahiwason an katonongan nin Dios, susog sa plano na poon sa daing kataposan na panahon naisip niya asin nautob ki Cristo Jesus satong Kagurangnan. Ini an dahilan kun tadaw ta makusog an satong boót na magdolok sa Dios, diyan ki Cristo asin huli kan pagtubos saiyang. Ini an sakuyang pamibi: nakaluhod ako sa atubang nin Ama: sa saiya minagikan an gabos na familia sa langit asin dagâ. Susog sa kayamanan nin saiyang

kamurawayan iwaras lugod saindo an balaog na kamo mapakusog kan kapangyarihan nin saiyang Espiritu. Huli sa pagtubod magdanay man lugod si Cristo sa mga puso nindo; an pagkamoot magin gamut asin sasaringan nin saindong buhay. Matalastas nindo, kaiba kan gabos na mga banal, an lakbang asin laba, an langkaw asin rarom kan pagkamoot ni Cristo; pagkamoot na dai matungkad kan isip, tanganing mapanô kamo kan bilog na kapanoan nin Dios.

Tataramon kan Kagurangnan.
Gabos — Salamat sa Dios.

Pagrokyaw

(Mateo 11, 29) (Tindog)
(Sinambit kun dai inawit an Alleluia)

Alleluia, alleluia! Pâsanon nindo an sakong sakal, asin mag-adal kamo sako, huli ta ako mahoyo asin mapakumbaba sa puso. Alleluia, alleluia!

Evangelio

(Juan 19, 31-37)

Sa paghorop-horop niato kan Mahal na Puso ni Jesus mababasa niato sa pagpahiling kan paggarod kan puso ni Jesus kan enot na Viernes Santo. Si Juan nagtutukdo na an Hawak ni Jesus iyo an Corderong inatang. An tubig asin an dugo nagtutukdo kan Bonyag asin kan Eucaristia.

P — An Kagurangnan mapasaindo.

B — Asin sa saimong espiritu.

P — ✠ Pagbasa kan Evangelio susog ki San Juan.

B — Kamurawayan saimo, Kagurangnan.

Aldaw idto nin pag-andam: an mga Judeo, tangani na an mga bangkay dai mawalat sa cruz sa aldaw na Sabado, huli ta dakulang aldaw an sabadong idto, nakimaherak ki Pilato na bararion an mga tabay asin haraleon. Kaya an mga soldados mga tabay naman kan sarô na ipinako, dangan an mga tabay naman kan sarô alagad pag-abot ki Jesus, nahiling na gadan na: dai ninda binarian an tabay; alagad sarong soldado ginatod an saiyang hirog, asin tulos bumunulos an dugo asin tubig. Saksi an nagsasabi kaini, asin an saiyang pagsaksi totoo. Aram na totoo an saiyang sinasabi, tanganing magtubod kamo; huli ta ini nangyari tanganing mautob an kasuratan: “Dai siya ninda binarian nin tulang”, asin sa ibang lugar sinasabi: “Mahihiling ninda an saindang ginatod.”

P — Marahay na Bareta kan Kagurangnan.

B — Pag-omaw saimo Cristo.

Homilia (Tukaw)

Pagrokyaw kan Pagtubod (Tindog)

Credo Niceno-Constantinopolitano

Gabos — Nagtutubod ako sa sarong Dios Amang makakamhan, kaggibo kan langit asin dagâ, kan gabos na nahihiling asin dai nahihiling. Asin sa sarong Kagurangnan na si Jesu Cristo, Bogtong na Aki kan Dios, asin namundag gikan sa Ama bagô kan gabos na panahon. Dios na gikan sa Dios, ilaw na gikan sa ilaw, totoong Dios, ipinangaki, dai linalang, saro sa pagka-Dios sa Ama: huli saiya nagkaigwa kan gabos. Huli sa satong mga tawo asin huli sa satong kaligtasan naghilig siya hale sa kalangitan.

(Sa mga minasunod na tataramon, abot sa asin nani-tawo, an gabos minaduko.)

Asin nani-laman huli kan Espiritu Santo ki Virgen Maria, asin nani-tawo. Ipinako pa sa cruz para satô kan panahon ni Poncio Pilato; nagtios sagkod sa kagadanan asin ilinobong, asin kan ikatolong aldaw nabuhay-liwat susog sa mga kasuratan, asin suminakat sa langit, nagtutukaw sa too kan Ama. Asin mamuraway na mabalik, sa paghukom sa mga buhay asin mga gadan, an saiyang kahadean daeng katapusan. Asin sa Espiritu Santo, Kagurangnan asin kagtao nin buhay: na gikan sa Ama asin sa Aki. Siya kaiba kan Ama asin kan Aki, sabay na sinasamba asin pinapamuraway: siya nagtaram sa paagi nin mga profetas. Asin sa sarô, banal, catolico asin apostolicong Simbahan. Nagpapahayag ako nin pagtubod sa sarong bonyag, sa pagpatawad nin mga kasalan. Asin naghahalat ako kan pagkabuhay-liwat nin mga gadan, asin kan buhay sa maabot na panahon. Amen.

Pamibi nin Banwaan

P — Mamibi kita sa Dios Ama na may dakulang pagsarig huli ta ki Jesus pinamugtak niya an saiyang Puso sato.

S — Kagurangnan, hinanyoga an samong pamibi.

1. Tanganing an Simbahan Catolico magin tunay na tanda asin kasangkapan kan pagkamoot ni Cristo, ipamibi niato sa Kagurangnan. (S)

2. Tanganing an mga familia mabuhay sa tunay na pagkamoot asin pagkasinarabotan, ipamibi niato sa Kagurangnan. (S)
3. Tanganing an mga napapagal asin nagagabatan makapahingalo sa matinaong Puso kan satuyang Paraligtas, ipamibi niato sa Kagurangnan. (S)
4. Tanganing an mga naghehelang makamidbid kan pagkamoot ni Cristo sa pakisumarô ninda sa pagsakit ni Jesus, ipamibi niato sa Kagurangnan. (S)
5. Tanganing an mga gadan magkamit kan kaogmahan sa Puso ni Cristo sagkod pa man, ipamibi niato sa Kagurangnan. (S)

P — Maheherakon na Ama, akon ining mga pamibi na dinodolot ming kasarô sa linugadan na Puso kan namomotan mong Aki. Siya na nabubuhay asin naghahade sa kapanahonan kan mga panahon.
B — Amen.

LITURGIA KAN EUCARISTIA

Pagdolot *(Tukaw)*

(Sinasambit kun mayong Awit sa Pagdolot)

P — Inoomaw ka, Kagurangnan, Dios nin gabos na linalang, huli ta sa saimong pagka-matinao nag-ako kami nin tinapay, na idinodolot mi saimo bunga kan dagâ asin kan gibo kan mga kamot nin mga tawo, ini magigin para samo tinapay nin buhay.

B — **Pag-omawon an Dios sagkod pa man.**

P — Inoomaw ka, Kagurangnan, Dios nin gabos na linalang, huli ta sa saimong pagka-matinao nag-ako kami nin arak, na idinodolot mi saimo bunga kan balagon asin kan gibo kan mga kamot nin mga tawo, ini magigin para samo inomon nin kalag.

B — **Pag-omawon an Dios sagkod pa man.**

P — *(Tindog)* Magpamibi kamo, mga tugang: tanganing an sako asin an saindong atang maako man lugod kan Dios Amang makakamhan.

B — **Akoon man lugod kan Kagurangnan an atang sa saimong mga kamot para sa kaomawan asin kamurawayan kan saiyang ngaran, para man sa pakinabang niato asin kan bilog niyang banal na Simbahan.**

Pamibi sa mga Dolot

P — Kagurangnan, namimibi kami, hilinga an mga dolot sa dai-

masabing pagkamoot kan Puso kan namomotan mong Aki, tanganing an samong dinolot magin para saimo inakong atang asin kabayadan kan samong kasâlan. Huli ki Cristo samong Kagurangnan.

B — Amen.

Prefacio

An daing-sukol na pagkamoot ni Cristo

P — An Kagurangnan mapa-saindo.

B — **Asin sa saimong Espiritu.**

P — litaas an mga puso.

B — **Initaas mi na sa Kagurangnan.**

P — Magpasalamat kita sa Kagurangnan, satuyang Dios.

B — **Maninigo asin Dapat.**

Totoong maninigo asin dapat, matanos asin nakakaligtas, na danay asin minsan saen magpasalamat kami saimo: Kagurangnan, banal na Ama, Dios na makakamhan na daing kasagkoran huli ki Cristo samong Kagurangnan:

Ta sa makangalas na pagkamoot, mantang nakabitay sa cruz, dinusay niya an sadiri man sana para satô, asin nagbulos an dugo asin tubig hale sa hirog na linugadan na nagin burabod nin mga sacramento kan Simbahan, tanganing, nabihag kan bukas na Puso kan Paraligtas, an gabos padagos na maogmang magsakdo sa mga burabod nin kaligtasan.

Kaya, kaiba kan gabos na Santos asin Angeles, sarabay kaming nag-oomaw saimo, daing tapos na nagsasabi:

Gabos — Banal, Banal, Banal an Kagurangnan Dios ni mga hukbô. An langit asin dagâ pano kan Saimong kamurawayan. Hosana sa kaitaasan. Paladan an minadigdi sa ngaran kan Kagurangnan. Hosanna sa kaitaasan.

Pamibi sa Eucaristia *(Luhod)*

P — Misterio kan Pagtubod.

B — **An pagkagadan mo, Kagurangnan, ipinapamareta niamo, an Pagkabuhay mo liwat ipinapahayag, sagkod na ika magdatong.**

P — Huli saiya, asin kaiba niya, asin sa saiya, saimo Dios Amang makakamhan kasarô kan Espiritu Santo, an gabos na kagalangan asin kamurawayan, sa gabos na kapanahonan kan mga panahon.

B — Amen.

RITO SA PAGCOMUNION

Ama Niamo *(Tindog)*

P — Natukdoan kan mga nakakaligtas na tugon, asin pinatood kan diosnon na kaugalian, nangangahas kitang magsabi:

Gabos — Ama niamo, na yaon sa langit: pabanalon an ngaran mo; magdatong an kahadean mo; mangyari an boôt mo sa dagâ nin siring sa langit. An samong kakanon sa aroaldaw itao mo samuya ngonian, asin patawadon mo kami sa samong mga kasâlan, siring na pinapatawad niamo an mga nagkakasalâ samuya; asin hare kami pagdaraha sa sugot; kundi agawa kami sa maraot.

P — Agawa kami sa gabos na maraot, namimibi kami Kagurangnan; warasan sa mga aldaw niamo an katoninongan, tanganing kaming natabangan kan saimong pagkaherak magin danay na talingkas sa kasâlan asin man ligtas sa gabos na kapurisawan: mantang kami naghahalat kan maogmang paglaom asin pagdatong kang samong Paraligtas na si Jesu Cristo.

B — **Huli ta saimo an kahadean, asin an kapangyarihan, siring man an kamurawayan sa mga kapanahonan.**

P — Jesu Cristong Kagurangnan, ika na nagsabi sa saimong mga Apostoles:

Katoninongan iwinawalat ko saindo, an sakong katoninongan itinatao ko saindo: hare paghilinga an samong mga kasâlan, kundi an pagtubod kan saimong Simbahan; asin papagkanigoa na siya mapatoninong asin magkaboronyog susog sa saimong kabotan. Ika na nabubuhay asin naghahade sa kapanahonan kan mga panahon.

B — Amen.

Pagpahayag kan Katoninongan

P — An katoninongan kan Kagurangnan danay na mapa-saindo.

B — **Asin sa saimong espiritu.**

P — Magpatinaraohan kamo nin katoninongan

Cordero

B — **Cordero kan Dios, na nagpaparâ kan mga kasâlan kan kinaban: kaheraki kami. Cordero kan Dios, na nagpaparâ kan mga kasâlan kan kinaban: kaheraki kami.**

Cordero kan Dios, na nagpaparà kan mga kasâlan kan kinaban: tawi kami nin katoninongan.

Pag-alok sa Pagcomunion *(Luhod)*

P — Uya an Cordero kan Dios, uya an nagpaparà kan mga kasâlan kan kinaban. Paladan an mga inapod sa pamanggi kan Cordero.

Gabos — Kagurangnan bako akong maninigo na ika magdagos sa sakuyang harong: alagad magtaram ka sana, asin an sakong kalag maomayan.

Antifona sa Comunion

(Cf. Jn 7, 37-38)

(Sinambit kun mayong Awit sa Comunion)

Olay kan Kagurangnan: An siisay man na napapahà, magdolok sako asin mag-inom. Mga salog nin tubig na buhay mabulos gikan sa kaladman kan nagtutubod sako.

Pamibi Pakacomunion *(Tindog)*

P — Mamibi kita.

Kagurangnan, an sacramento nin pagkamoot nagpalaad samo sa banal na kaogmahan, na huli kaini, kaming danay na magdagka kan saimong Aki, makanood na magpahayag saiya man sana sa kapwa. Siya na nabubuhay asin naghahade sa kapanahonan kan mga panahon.

RITO SA PAGTAPOS

Huring Bendicion

P — An Kagurangnan mapasaindo.


B — Asin sa saimong espiritu.

P — Asin bendicionan kamo kan Dios na makakamhan: an Ama, asin an Aki, ✠ asin an Espiritu Santo.

B — Amen.

P — Lakaw kamo sa katoninongan ni Cristo.

B — Salamat sa Dios.



PAMIBI PARA SA TAON KAN MISION SA MGA NACION

O Dios, mamomoton niamong Ama, pinadara mo an saimong Bogtong na Aki sa kinaban tanganing iharubay an Marahay na Bareta nin kaligtasan sa gabos: sa mga makasâlan, sa mga dukha, sa mga inaapi, sa mga naghehelang, sa mga hinaboan, sa mga pinabayaan. Idinusay niya an saiyang buhay sa Cruz para samo. Asin nabuhay-liwat sa bâgong buhay tanganing iligtas kami asin makipag-olian saimo. Ipinadara mo an saimong Espiritu Santo sa mga Apostoles tanganing ipadagos an gibo kan saimong Aki asin darahon an gabos sa kaligtasan.

Nagpapasalamat kami saimo Ama, sa pagdara samo gikan sa kadikloman pasiring sa kaliwanagan. Huli kan saimong mamomoton na plano, limang gatos na taon na an nakaagi, nag-abot sa samong ronâ an mga misionero tanganing iharubay sa samong mga kamagurangan an Evangelio ni Jesus, saimong Aki, Huli kaini kami nagin saimong banwaan asin Simbahan. An balaog nin pagtubod an samong antabay sa kadikloman asin sa kaliwanagan, sa mga kadaogan asin kapangganahan kan samong kasayasayan bilang saimong banwaan. An samong pagtubod nagin tunay na liwanag na nagbabanaag sa kadikloman.

Bagoaha samo an biyaya kan saimong Espiritu na nagsasadol samo na magin mga saksi ni Jesus saimong Aki, sa kinaban na baranga huli sa kapasloan, violencia, injusticia, kahelangan asin pagtios.

An samong pagtubod makadara lugod samo sa pagkasararo bilang mga aki mo na atamanon asin kamotan an lambang sarô. An Espiritu Santo magpakusog logod samo tanganing kami magin mga paraharubay kan Marahay na Bareta sa samong mga tugang sa Asia asin sa gabos na mga nacion. Tawe kami nin odok sa boót na kamawotan na tabangan an samong kapwa na madara sinda sa pagtubod sa Kagurangnan na si Jesus tanganing makahiras sinda sa saimong kaogmahan asin buhay.

Antabayan asin ipamibi lugod kami ni Nuestra Señora de Peñafrancia, an Bitoon kan Pagharubay kan Marahay na Bareta, sa samong buhay asin sa paghiras kan samong pagtubod sa samong kapwa.

Lugod an samong lipotok na pagkamoot asin devocion saiya, samuyang Mahal na Ina, maghubog samo na magin mga tunay na disipulos asin mga saksi ni Jesus sa gabos, andam sa gabos na panahon na magin makinuyog-kuyog sa anuman na hagadon ni Jesus samo.

Ini hinahagad mi sa ngaran ni Jesu Cristo, saimong Aki, na nabubuhay asin naghahade, kasarô kan Espiritu Santo, Dios, sa kapanahonan kan mga panahon. Amen.



sambanwá
GIYA SA PAGSAMBA KAN BANWAAN NIN DIOS



MOST REV. ROLANDO J. TRIA TIRONA, OCD, DD, Arzobispo kan Caceres
REV. FR. LUISITO A. OCCIANO, Direktor, Caceres Commission on Communications
REV. FR. GLENN C. RUIZ, Direktor, Commission on Liturgy
REV. FR. ERIC P. BOBIS, In-Charge, Social Media
JOHN PAUL M. AVEN asin **JUAN CARLOS R. MADRID**, Mga Editor

Hinimo asin inandam kan Archidiocesis nin Caceres, sa pangengenot kan Caceres Commission on Communications asin Commission on Liturgy. Ciudad nin Naga, Pilipinas • 2021

TABANGAN NA MASUSTENIR AN SAMBANWÁ!

Para sa mga donacion, puwedeng magdeposito sa:
Banko asin Branch: **BDO UNIBANK, INC. (BDO) PANGANIBAN DRIVE, NAGA CITY**
Account Name: **CACERES COMMISSION ON COMMUNICATIONS**
Account Number: **008440050319**